

KUA MOE A HENARE METE TE AMOHAU

No te po o te Taite Maehe 24th ka moe a Henare Mete, ara a Te Kiwi te Amohau i te moenga roa. I mate atu ia ki te marae tapu o ana matua ara ki Te Papa-i-Ouru i Ohinemutu. Ko ia te-tahi o nga tino uri rangatira o roto o nga hapu maha o Te Arawa. He tangata mohio ki te whakatakoto korero he roka hoki te reo ki te wa'ana. I tona tai-tamarikitanga tae noa ki tona kaumatua-tanga ko ia tonu te kai-tohutohu mo nga mahi ngahau a te Maori i nga wa e eke mai ai nga manuhiri tuarangi ki Te Papa-i-Ouru.

He kai-karakia whai-raihana hoki ia no te Hahi o Ingarangi. He tino reo pai hoki ki te panui mai i nga upoko karaipiture i roto i nga karakia. Kaore rawa i te wareware i to tatou matua i a Atipihopa Awarere tona hoa ngahau a Te Kiwi.

I te taenga atu o te Etita o ta koutou pepa ki Ohinemutu i a Hanuere ka taha nei, rokohanga atu e takoto ana a Te Kiwi. Ka mutu te karakia i a ia, ka tukuma mai tana ohaki.

TE OHAKI A HENARE METE TE AMOHAU.

Te Iwi, tena koutou. Te Papa-i-Ouru, tena koe. Kua tata tenei ki te wa e tika ana hei mihinga iho ki te Iwi, ki te whenua, ki te waka, i te mea ra kua kitea iho kua tata mai te po, me te pouritanga ki te tinana, a kua kapi hoki te wairua i te pouri.

Hei konei te iwi, hei konei te waka, e haere ana tenei i te Toi, i te Mahuri o te Heketanga-a-rangi ki oku matua.

I muri nei, kia mau, kia u, te titi i te kotuku a o tatou papa, he kotuku turanga rau, kai rere i nga hau o Tumatauenga.

Kia anga mai te araro ki te rerenga mai o te ra, kei hurihia ki muri, a, ka ngaro te ture i a koutou.

Whakatika, haere i runga i nga takahanga waewae o te Ariki, kei epaina noutia ki te kohatu i nga huarahi o te hunga wairangi.

Tahuna nuitia te kawiri o te whakapono, o te Tunanako, o te Aroha ki te Atua.

Ki te pakaru a Te Arawa, aukahatia ano kia rite ki te Aukahatanga a to tatou matua a Temuera i hoka ai nga ngaru o te kino kua taha ake nei. Ahakoa pakaru tangata, pakaru ki, o te motu, houhia ki te Amokura. Ko te akatea tena i takua ai te upoko o Rangitihia whakahirahira, a i tenei ra ko te ture taua akatea.

Manaakitia nga whakahaau a te Kawanatanga.

Manaakitia nga whakahaere a a tatau tamariki.

E te Atua, tohungia te Iwi me aku tamariki.